

Эрдмтә-билгтә багъчуд

Хавр эклджәсн цаг билә. Каспийск загъсна комбинатд кōдлдг хальмг багъчуд художественн самодеятельность бурдәхмн гидж кӯундцхәв.

—Хальмгин ду-бинг олн-әмтнд сонъсгъх, үзүлх керг-тә,—гидж Иван Добдушкаев, гармонь татдг Цеденов Улм-джд келв. Эдн дуулдг, биил-дг багъчуд цуглулв. Түрүләд зургъан кӯн билә, дакад йисн болв.

Нег дакдж загъсна комбинатин клубд хальмг концерт гарв. Эн түрүн концерт билә. Дуту-дунд, тату-тартг чигн харгъв. Болв эн концертин хōбн багъчуд бийсн кружокд ирцхәв.

Ода эн художественн коллективиг кружок гидж келдж болшго. Бүкл ансамбль болв—30 шаху багъчуд орлцна. Тедн райогъар йовад йисн концерт үзүлв. Эн комбинатин багъчуд ганцхн кōдлмшәрн биш, билг-

эрдмәрн чигн олнд үзмдж болна.

Теднә репертуарт: „Бумбин орн“, „Штаб полка“, „Сартг эрәтә цииц бишмуд“, „Хаалгъ“, „Агчин улан бетк“, „Ялу-ха“, „Нуудлә“, „Цагъан“, нань чигн хальмг дуд бәәнә. Хальмг бинч Андрей Кадышев йир сәәнәр биилиә, Сангаджи-Гаряев „Ишкмдг“ биилиә.

Шараев Николай хальмг домбрт „Бродяга“ гидг индийск дууна айс цокна. Домбрчир Шараев, Халгаева, Босхмджева гурви хальмг домбрт орс болн хальмг айсмуд цокна.

Консерв кедг цехд кōдлдг Очирова Вера, Тогульчинова Тося, промкомбинатд кōдлдг Босхомджиева Александра, Эрдни-Гаряев—эдн эрки сән билгтә багъчуд.

Эн багъчуд Алдр Октябриң 40-ч джилни өөнд ик сән концерт белдлж бәәнә.

Б. ГАСАНОВ